

I yu'xarij ti anaquéej jo'yú'xaca' a'íjna i San Pablo a'íimaj jimi i maj Tesalónica jo'cháatima'caa

Pablo pu hua'tyojtye'

1 ¹Nyáaj i nyáaj Pablo pué'een, a'íjna i Silvano ajta a'íjna i Timoteo, a'yaa tu já'muatyojtye' mua'ajmaj mu siaj Tesalónica ja'chej, i siaj siajta tyá'tzaahuatye' i Dios jimi, siajta jimí tyámua' tyí'tyesejre' i tavástara' a'íjna i Jesús ti ajta Ciríistu' pué'een. Che' i Dios tyámua' tyajamuáacha'iin ajta jamuaatyápuar'itye'en ja'mua tzajta'.

Pablo pu jéehua tyé'tyojtzire' i Dios

²A'náj tina'aj tu tyé'tyojtzire' i Dios ja'mua jime', tyajta jamua'tamuá're'rii tyati'íjtá jahuoocaj i Dios jimi. ³A'náj tina'aj tu ja'tamuá're'rii je'ej ti jéehua i Dios tyámua' jamuáaruuj a'íjna jime' i siaj jitzán tyá'tzaahuatye', siajta jéehua tyí'muarie' a'íjna jime' siaj jaxie've' siaj séecan huatyáhuire'en i Dios jimi, jéehua xu tyé'viicue' a'íjna jime' siaj jacho've' i tavástara' a'íjna i Jesús ti ajta Ciríistu' pué'een, a'íjna jitze ma'can i Dios. ⁴Nye'ihuáamua' i nyaj jéehua já'muaxie've' i Dios jitze ma'can, tyámua'reej ti i Dios jamua'antyíhuo. ⁵Ji'nye tyati'ij jamuáa'ixaa i nyúucaria'ra' i Dios, catu a'yaa tyana'aj tyajamuáa'ixaa, sulu a'yaa tu tyajta huaríj je'ej ti tyé'ijta i júuricama'ra' i Dios tyajta a'íjna jime' i ti jin néijmi'i putyí'uurej, jéehua tu a'íjna jin tyé'tyojtzire'. Tyámua' xu mua'aj tyá'mua'reej je'ej tyaj huaríj tyej tyij mua'ajmaj tyámua' jamuáa'uurej.

⁶Siajta mua'aj, a'yaa xu huaríj je'ej tyaj tyajamuáa'ixaa, siajta a'yájna je'ej ti tyé'ijta i tavástara', siajta jáanamujri' i nyúucarij xuutyámua've'ej a'yájna je'ej ti tyajamuáatá' i júuricama'ra' i Dios a'íjna jime' i nyaj jin jajpuéjtzij. ⁷A'íj xu tyámua' tyihuo'tá' a'íjma i maj tyá'tzaahuatye' i Macedonia maj já'ma'can, siajta i Acaya maj já'ma'can. ⁸Capu a'áa na'aj já'namujre' je'ej siaj mua'aj ricij, sulu néijmi'que' pu namujre' je'ej siaj mua'aj ricij a'íjna jime' i

nyúucaria'ra' i tavástara', a'yaa mu tyá'mua'reej sij mua'aj ja'astej i nyúucaria'ra' i Dios, a'íj pu jin quee che' juxie've' tyaj ityáj tyihuá'ixaatye'ej ja'mua jime'. ⁹A'íi mu jujíimua'aj jaataxájtaca' je'ej tyaj huaríj tyati'íj a'áa ja'rá'aj, ajta je'ej sij mua'aj metyihuoo'huá'xij i sáanturij sij sij a'íj huatyáhuire'en i ti ji'r'é'can jime' Dios pué'een ¹⁰siajta a'yan tye'ejchó've'ej ti ajtáhua'aj ya'uvé'nyej i tavástara' i ti yó'jra' pué'een i Dios, i ti ajta jaatájuurityej. A'íjna i Jesús a'íi pu a'íin pué'een i ti ti'rátoosij ti'íj quee puéjtzij táaci'tyij.

Pablo pu jaxaj je'ej ti tyí'muarie' a'ájna a Tesalónica

2 ¹Siajta mua'aj nye'ihuáamua', tyámua' xu tyá'mua'reej tyaj quee huáapua'aj tyana'aj jamojo'vá'muaariaca'. ²Ajta a'yájna siati'íj seríj siajta tyá'mua'reej, anaquéej mu je'ej pua'aj táaruu' a'íimaj i Filipos maj ja'chej, Dios pu taatáhu'í tyej tyij mua'ajmaj jamuaaté'examatye'en i nyúucaria'ra', ajta ca'nyíjra'aj taatá' tyej tyij ca'nyíin jin huatyé'nyo'se'en. ³Ji'nye catu hue'tziz jin tyajamuáa'ixaa, catu tyajta a'íjna jime' tyej tyij je'ej pua'aj jamuáa'uurej, nusu tyej tyij tyi'tíj jin jamuáacuanamuj. ⁴Ajta ityájma, Dios pu ta'antyíhuo ajta taata'íj tyej tyij huó'ixaatye'en i nyúucaria'ra', a'íj tutyij jin tyajá'mua'ixaatye'. Catu a'yan tyá'huoo tyej tyij tyámua' tyihuotá'an i tye'ítyee, sulu tyej tyij tyámua' tyaatá'an i Dios, i ti jamua'reej je'ej tyaj tyí'mua'tzej i tatzájta'. ⁵A'yájna siati'íj mua'aj seríj tyá'mua'reej tyej quee a'náj nyúucarij jin tyajamuáa'ixaa ti naa huánamujrii, catu tyajta a'yan tyá'huoo tyej tyij a'íjna jin tyi'tíj ancuriáan. Dios pu jamua'reej tyaj tzáahuatyí'ra'aj jin a'yan ricij. ⁶Catu tyajta jahuoo mej mij séecan naa tojo'sejra, típua'aj mua'ajmaj jimi nusu séecan jimi. ⁷Tyij quee i'rítacaj tyaj a'yan huárinyiiche' a'íjna jime' ti i Ciríistu' ta'antyíhuo, ajta ityáj catu a'yan huaríj, sulu tyámua' tu tyajamuáacha'íj. A'yájna ti'íj i hua' náanaj i ti'ríij tyámua' tyihuá'cha'íj i juyó'jmua', ⁸a'yaa tu jéehua tyaja'muaxie've' mua'ajmaj, capu a'yaa na'aj tyita'ránajchaca' tyaj a'íj jamuaaté'examatye'en i nyúucaria'ra' i Dios, sulu tyej tyajta huá'cui'nyij ja'mua jitze ma'can. A'yaa tu jéehua tyaja'muaxie've'. ⁹Ta'ihuáamua', mua'aj xu jamua'reej tyaj jéehua tyu'muáriej, tyajta jaapuéjtzitariaca'. Jéehua tu tyu'muáriej tújca tyajta tíca', tyej tyij quee a'tíj huatamuárie'riste'en tyati'íj já'mua'ixaatya'ca'aj i nyúucaria'ra' i Dios.

¹⁰Mua'aj xu tyámua' naa tyá'mua'reej, a'yájna ti'íj ajta i Dios tyá'mua'reej, tyej tyámua' naa tyi'tyítacha'íij ja'mua jimi mu sij tyá'tzaahuatye', catu a'tíj je'ej pua'aj huáruuj, catu tyajta tyi'tíj jin ootyá'ítzee. ¹¹A'yaa xu siajta tyá'mua'reej tyaj jéehua ca'nyíjra'aj jamuaaté' tyajta tyámua' tyajamuáe'ye'je séej tyajta séej, a'yájna ti'íj tyihuá'íitiij i hua' táataj i juyó'jmua'. ¹²A'yaa tu tyajta tyajamuáa'íjca sij sij tyámua' tyityetyúucha'íij a'yájna mati'íj i maj i Dios jimi

séejre', ji'nye a'íi pu a'íin pué'een i ti jamuaatajé, sij sij a'áa ja'rá'astij jo'tij a'íin tyejé'íjtaj.

¹³A'íj tu jin ityáj a'náj tina'aj tyé'tyojtzire' i Dios, ji'nye siati'íj mua'aj jáanamujri' i nyúucaria'ra' i Dios, i tyaj jamuáa'ixaa, a'yaa xu tya'ancuriáa' ti'íj Dios nyuucáaj, caxu a'yan tya'ancuriáa' ti'íj i tyétyacaa nyuucáaj. A'yaa pu tyi'ja'yájna ti nyúucaria'ra' pué'een i Dios, a'íi pu tyámua' jamuáaruuj i ja'mua tzajta' mu sij tyá'tzaahuatye'. ¹⁴Siati'íj mua'aj ta'ihuáamua' jaapuéjtzitariaca' i ja'muatyeítyeristyamua' jimi, a'yaa pu cha'tána'aj tyihuó'ruuj a'íijma i maj Judea jo'cháatimee, i maj majta jusi'rii u tyejúuj tzajta' mej mij jaatyáanajche i Dios, i maj majta i Ciríistu' jitze ajtyáma'can, ji'nye a'íi mu majta jajpuéjtzica'aj a'íijma jimi i juxa'aj tyeítyee i maj Judea já'ma'can. ¹⁵A'íi mu a'íin pué'een i maj jaajé'caj i tavástara' ti ajta Jesús pué'een, a'yájna mati'íj majta tyihuo'cuui a'íijma i maj Dios jitze ma'can tyi'xajtaca'aj, a'íi mu majta taatamuárij ityájma. Camu tyé'tyojtzire' i Dios, majta mu hua'ajcha'íire' néijmi'caa i tyeítyee, ¹⁶ji'nye tyati'íjtá tyihuá'ixaatya'mui'íj a'íimaj i maj quee Israel jitze ajtyáma'can, ti'íj ajta huó'huíire'en, camu a'íimaj tatá'caa tyaj a'yan huárinyij. A'yaa mu mij tyá'mue'tij ti i Dios jéehua puéjtzij huo'tá'an. Ajta ta'aj ij huatyáapua'rej a'íjna, Dios pu arí jéehua puéjtzij huo'ta'.

Pablo pu jaxie've' ti ajtáhua'aj huojo'vá'muaarej i Tesalónica maj ja'chej

¹⁷Ta'ihuáamua', tyati'íj ajtacíj ja'mua jimi, catu majamuuhuá'xij, tyij tyajta quee já'muasejraca'aj, a'náj tina'aj tu mua'ajmaj jitze tyi'mua'ajcaa, tyajta a'yan jéehua tyá'xie'va'ca'aj tyaj jamojo'tyéesej. ¹⁸A'yaa tu tyu'tatyésej tyaj a'áa ja'tanyéj, nyajta nyáaj Pablo mue'tíj nu a'yan tyá'xie'va'ca'aj nyaj a'áa ja'tanyéj, ajta i tyiyáaru' pu tyi'tyánaamuaaj. ¹⁹Ji'nye, ¿a'tanyíj a'íin pué'een i tyaj jin tyi'íjchó've', i tyaj jin tatyamua've', ajta i tyaj jin á'tatzaahuatye'en a'ájna xicáara' jitze ti'íj uvé'nyej i tavástara' ti ajta Jesús pué'een? Tipua'aj sequée mua'aj a'íin pué'eenye', capu máaj a'tíj a'íin pue'éenye'e'j ta'mej. ²⁰A'yaa pu tyi'ja'yájna, mua'aj xu a'íin pué'een i tyaj jin á'tatzaahuatye' sijta i tyaj jin tatyamua've'.

3 ¹Aj tutyij tyati'íj quee che' je'ej huaríj, a'yaa tu tyaaxá'pui'intarej tyaj tajíimua'aj a'áa jo'tyá'ítzeere'en a'ájna a Atenas ²tyajta je'en a'íj huata'ítyaca' i ta'ihuáara' Timoteo i ti tajamuán tyi'muarie' i Dios jimi, tyej tyij huo'té'exaatye'en i nyúucaria'ra' i Ciríistu', a'yaa tu een jime' jaata'ítyaca' ja'mua jimi ti'íj ca'nyíjra'aj jamuata'an a'íjna jitze i sij jitzán tyá'tzaahuatye', ³ajta ti'íj quee huatóoxaahuataj a'íjna jime' i sij jin jajpuéetzij. Ji'nye mua'aj xu a'yan tyá'mua'reej ti a'yan tyúuxie've' sij a'yan tyaapuéjtzitarej. ⁴Ajta, tyati'íj tyooj a'áa jo'tyá'caj ja'mua jamuán, a'yaa tu tyajamuáa'ixaa tyaj

a'yan tya'ajpuéetzij ta'me'nyíche', a'yaa pu'ij tyu'ríj, siati'ij seríj tyá'mua'reej. ⁵A'íj nu jin, nyati'ij quee che' pu jáaruuj nyaj a'áa ja'tanyéj, a'yaa nu tyu'ta'íjtaca' mej mij tyajamuáata'íhuo' nyej nyij jáamua'reej je'ej ti tyajá'muahuiiria'ca'aj a'íjna jime' i siaj jitzán tyá'tzaahuatye', ji'nye a'yaa nu tyí'tziinya'ca'aj ti i tyiyáaru' tyi'tíj jin jamuaatamuárie'riste'en siaj sij quee che' tyá'tzaahuatye'ej ajta ti'ij quee che' tyi'tíj huiriia'aj já'ra'nyij i tyaj jin tyu'muáriej ja'mua jimi.


⁶Ajta i Timoteo pu'ríj yará'aj a'áa ti ja'rájraa ja'mua jimi, a'yaa pu tyitaaté'exaaj siaj tyámua' een a'íjna i siaj jitzán tyá'tzaahuatye' ajta je'ej siaj tyihuá'xie've' i séecan. A'yaa pu tyitaaté'exaaj siaj jéehua ta'tamuá'rerii, siajta jéehua jaxie've' siaj taaséj, a'yájna tyati'ij tyajta ityáj tyá'xie've' tyaj jamuaaséj. ⁷A'íj tu jin, ta'íhuáamua', tyij ajta jéehua tyí'tatyehuaritye' tyajta taxaamuíjitye', jéehua tu huátatyamua'vej tyati'ij jáamua'reeri' siaj siooj tyámua' naa tyá'tzaahuatye'. ⁸Tyati'ij a'yan tyámua'reeri' siaj siooj tyá'tzaahuatye' i tavástara' jimi, jéehua pu ca'nyíjra'aj taatá' i tatzájta'. ⁹¿Ji'nye tyí'riij tyej tyij jéehua tyaatatyójtzi're'en i Dios a'íjna jime' i tyaj jin tatyamua've' jimi, mua'ajmaj jime'? ¹⁰Tújca tyajta t'ca' a'yaa tu tyá'huavij i Dios ti taatá'an tyej tyij tyajtáhua'aj jamuaaséj, tyajta jamuaatáhuire'en tyaj janéijmi're'en i ti jamuá'itziitye' i siaj jin tyá'tzaahuatye'.

¹¹A'yaa tu jéehua tyá'xie've' ti i Dios i tyaj jajvástara', ajta a'íjna i tavástara' i Jesús, maj a'íin taatáhuire'en tyej tyij a'áa ja'tanyéj ja'mua jimi. ¹²Che' ajta i tavástara' jamuáave'sij siaj sij jéehua huóoxie've'en séej siajta séej, siajta huó'xié've'en néijmi'caa i tyeítyee, a'yájna tyati'ij ityáj tyaja'muaxie've'. ¹³Ti ajta tyámua' jamuáa'uurej i já'muatzajta', siaj sij quee tyi'tíj jin á'itzeeria'aj i Dios jimi i tyaj jajvástara' a'íjna ti'ij uvé'nyej i tavástara' i Jesús, jamuán i maj tyí'huire' u tajapuá. Che' a'yan tyá'ra'nyij.

I júuricamej ti ja'ráanajchi i Dios

4 ¹Ajta ijíj ta'íhuáamua', a'yaa tu tyaja'muahuavij tyajta a'yan tyajá'mua'ijcatye' a'íjna jitze ma'can i tavástara' Jesús, siaj a'náj tina'aj tyámua' eenye' siajta tyámua' tyityetyúucha'íj a'yájna siati'ij tyaari'rej ityájma jimi, siaj sij tyaatatyójtzi're'en i Dios, a'yájna siati'ij seríj ricíj.

²Mua'aj xu'ríj jamua'reej je'ej tyaj tyajamuáa'ixaa jitzán ma'can i ti jin tyi'tyéjvee i tavástara' Jesús. ³A'yaa pu i Dios tyá'xie've' siaj tyámua' eenye', tiquee a'tíj juxana'ciria'aj ⁴a'yaa pu tyúuxie've' ti síj ajta síj tyámua' tyéecha'íin i jutyévíj, ti'ij tzaahuatyi'ra'aj jin séjre'ej, ⁵tiquee a'yan rijcaj je'ej ti jusíj tyá'xie've' tyi'tíj jime' ti quee xá'pui', a'yájna mati'ij ricíj i tyeítyee i maj quee jamua'tyej i Dios. ⁶Che' quee a'tíj tyi'tíj jin a'yan rijcaj, ajta quee juxana'ciria'aj jamuán íira'ra'an i



1 Tesalonicenses 4:11-12

juxa'aj tyévíj, ji'nye tavástara' pu jéehua puéjtzij jaatá'sij a'tíj ti a'yan ricij, a'yaa tu tyeríj tyeemí' tyajamuáa'ixaa. ⁷Ji'nye capu i Dios a'íjna taatajé tyej tyij je'ej pua'aj éenyel'que' séjre'ej, sulu tyej tyij ji'rén'ye'ej séjre'ej i tatzájta'. ⁸A'yaa pu'ij, a'íjna i tiquee tyá'tzaahuatye' je'ej tyaj tyajá'mua'ixaatye', capu a'íj ma'úuhua'xij i huá'nyuucaa i tyétyacaa, sulu a'íj pu quee á'tzaahuatye' i Dios i ti ju júuricamej jamuaatá' tí'ij ja'mua tzajta' séjre'ej.

⁹Ajta a'íjna jime' i sij jin huóoxie've'en i sij ju'ihuáamua', capu juxie've' tyaj a'íjna jin tyajá'muayu'se'ej, ji'nye Dios pu arí jamuaamua'tyej je'ej sij tyityahuóoxie've'en séej jamuán sijta séej. ¹⁰A'yaa xu mua'aj ricij a'íjna jime' sij hua'xie've' i ju'ihuáamua' i maj a'áa jo'cháatimee néijmi'que' a'áa ti huaca'aj a Macedonia. Tyajta ityáj, a'yaa tu tyaja'muahuavij ta'ihuáamua' sij jéetze' huóoxie've'en. ¹¹Siata'aj juxáahuaj naa tyí'tyechajcaj setyi'muárie'ej i jumuáca' jime' je'ej ti tyi'tíj tyaací'ij séej ajta séej, a'yájna tyati'ij tyeríj tyajamuaa'íjca, ¹²mej mij i maj quee tyá'tzaahuatye' jamuaatyátzaahuatye'en, ajta tí'ij quee tyi'tíj jamuá'itziitye'ej.

Ti'ij uvé'nyej i tavástara'

¹³Ta'ihuáamua', catu jaxie've' sij quee jamua'réerej je'ej ti tye'mej a'íimaj jimi i maj meríj huácuij, siata'aj quee juxaamuijritya'aj mati'ij i séecan, i maj quee jacho've' i tavástara'. ¹⁴A'yájna tyati'ij tyá'tzaahuatye' ti i Jesús huamuí' ajta je'en huatájuuriaca', a'yaa tutyij tyajta tyá'tzaahuatye', ti i Dios huo'tájuuritye'ej i Jesús jamuán a'íjma i maj huácuij jimi metya'tzáahuatye'ej.

¹⁵ A'íj tu jin a'yan tyajá'mua'ixaatye' i tavástará' jítze ma'can tijn, ityáj i tyaj júurij a'yan huatyá'ítzeere'ej íyan i cháanacaj japua, catu anáatya'aj tá'ju'un a'íjma jimi i maj meríj huácuij. ¹⁶ Ji'nye nyúucarij pu huatánamuajre ti'ij tyu'ta'íjtaj, a'yaa pu ajta tyu'tánamuajrej ti'ij a'tíj ti ca'nyíin tyu'táci'sitye'en a'ájna jo'tij i Dios já'sejre', aj pu'ij i tavástará' aje'cányesij a jútye'. Majta i maj huácuij metya'tzáahuatye'ej i Círíistu' jimi, a'íi mu anaquéej huatájuuritaj, ¹⁷ tyajta je'en ityáj, i tyaj júurij a'yan séejre' i cháanacaj japua, a'íi pu ajta tá'vi'tin i jéetirij tzajta' hua' jamuán i maj moochán huatájuuriaca', tyej tyij ja'antynájchej i tavástará' i jéetirij tzajta', a'yaa tutyij jusén jin tyeje'séeria'aj tá'ju'un i tavástará' jamuán. ¹⁸ A'íj xu jin, siata'aj ca'nyíjra'aj huatóoa'an a'íjna jime' i nyúucarij i nyaj jamuáa'ixaa.

5 ¹ Ajta a'íjna jime' a'tzáaj ti uvé'nyesij i tavástará' nusu a'náj ti huataséjre'sij, ta'ihuáamua', capu juxie've' tyaj a'íjna jin tyajá'muayu'se'ej. ² Tyámua' xu mua'aj naa tyá'mua'reej ti a'ájna xicáara' ti jitzán uvé'nyesij i tavástará', a'áa pu a'yan tye'mej siati'íj pua'aj quee jacho've', a'yaa pu tyu'taséjre'sij ti'íj náhua'rij ti utyárutyij tíca' jo'siaj ja'chej. ³ Mati'íj i tye'ítyee a'yan tyí'xajtaj tijn: “Capu che' tyí'tíj je'ej ricij, pu'ríj tyu'puá'riajraa”, aj pu'ij a'ájna atyojo're'nyesij i xicáara' maj jitzán antyipua'rij, a'yájna ti'íj íitaj ti ootacuí'nyej, capu huatá'i'riitarij maj huatóo'uunaj. ⁴ Siajta mua'aj, ta'ihuáamua', caxu tíca'riste' séejre', a'íj pu jin quee a'yan tye'mej ja'mua jimi ti'íj náhua'rij ti utyájrutyij jo'siaj ja'chej, a'ájna xicáara' jítze ti'íj tavástará' uvé'nyej. ⁵ Néijmi'i xu mua'aj a'íjma jimi ajtyáma'can i maj a'áa já'sejre' jo'tij jó'nyeerí'ij i Dios jimi. Catu hua' jítze ajtyáma'can i maj tíca'riste' jó'jujhua'an, nusu jo'tij quee jó'nyeerí'ij, ⁶ a'íj tu jin quee a'yan rinyij mati'íj i séecan i maj a'yan séejre' mati'íj i maj cu'tzuj, sulu tyiche' atanyéjnye'rij tyajta tyámua' metyityoomuámua're'ej. ⁷ A'íimaj i maj cu'tzuj, a'yaa mu tíca' tyí'tyacu'cuj, majta i maj juta'rujve', a'íi mu majta tíca' juta'rujve', ⁸ tyajta ityáj, nyéeri'iste' tyaj ci'nyej, a'yaa pu tyúuxie've' tyaj a'náj tina'aj tyámua' eenye'. Tyiche' huátacha'íin, a'íjna jime' i tyaj jin tyá'tzaahuatye' i tavástará' jimi tyajta huátaxie've'en, tyiche' tyajta a'íjna jin avátanaj i tyaj jin jacho've' ti i Dios tíi'rátóonyij. ⁹ Ji'nye capu i Dios a'íjna jin ta'antýíhuo tyej tyij jajpuéetzij tá'ra'nyij, sulu ti'íj táahuíire'en a'íjna jítze ma'can i tavástará' Jesús ti ajta Círíistu' pué'een. ¹⁰ A'íi pu tajitzé ma'can huamu', tyej tyij júurij tá'ra'nyij jamuán i tavástará', tipua'aj i tyaj júurij, na'ríij i maj meríj huácuij, néijmi'i tu jimi huatyá'ítzeere'ej jusén jime'. ¹¹ A'íj xu jin ca'nyíjra'aj huatóoa'an séej siajta séej, a'yájna siati'íj seríj ricij.

Je'ej maj tyityetyúucha'ij i maj tyá'tzaahuatye'

¹² Ta'ihuáamua', a'yaa tu tyaja'muahuaviij siaj tyámua' tyihuá'ajcha'ij a'íjma i maj ja'mua jimi tyí'muarie', i maj majta

a'íjna jin antyúumua'reej maj tyajamuaamuá'tyej je'ej ti tyá'xie've' i tavástara'. ¹³A'yaa pu tyúuxie've' siaj jéehua huo'xié've'en, a'íjna jime' i maj tyí'muarie' ja'mua jimi. Tyámua' xu huojomua'raj séej siajta séej.

¹⁴A'yaa tu tyajta tyajá'mua'ijcatye', ta'ihuáamua', siaj tyámua' huó'uurej a'íjma i maj quee xá'pui' ricij, siajta ca'nyíjra'aj huo'tá'an a'íjma i maj quee juca'nyej i juxiéjnyu'caa tzajta', siajta huo'táhuire'en a'íjma i maj quee tyámua' ricij, siajta néijmi'caa á'cu'vaj.

¹⁵Tyámua' xu'uj mua'aj ti'ij quee a'tíj je'ej pua'aj ja'uurej i juxa'aj tyévíj. Sulu siata'aj a'náj tina'aj tyámua' eenye', a'yájna siati'ij jujíimua'aj tyityetyúucha'ij siajta a'yan cha'taj siana'aj tyityetyúucha'íij néijmi'caa jimi i maj a'yan séejre' i cháanacaj japua.

¹⁶A'náj tina'aj xu jutyamua've'ej. ¹⁷Siajta a'náj tina'aj jahuoocaj i Dios jimi. ¹⁸Néijmi'i xu jin tyé'tyojtzire'ej i Dios, ji'nye a'yaa pu tyá'xie've' ja'mua jime' i siaj tyá'tzaahuatye' i Ciriístu' jimi i ti ajta Jesús pué'een.

¹⁹Caxu já'je'cataj i júuricama'ra' i Dios. ²⁰Caxu jaxaahuataj a'íjna i siaj Dios jitze ma'can tyihuo'té'examatye'en. ²¹Siata'aj anaqueej tyámua' tyámua'reej tyi'tíj ti xá'pui' nusu i tiquee siajta je'en a'íj huatyátzaahuatye'en i ti xá'pui'. ²²Xa'ajtáciinyij a'íjna jitze i ti je'ej pua'aj een.

²³Che' a'íi cha'tána'aj i Dios, a'íjna i ti jamuaatyápua'rityej, che' a'íin tyámua' jamuáa'uurej, siaj sij quee tyi'tíj jin á'itzeeria'aj i ja'muaxiéjnyu'caa tzajta', nusu ja'muamua'tziira'aj jitze, na'ríij i ja'muatyévíj jitze, a'ájna xicáara' jitze ti'ij uvé'nyesij i tavástara', a'íjna i Jesús ti ajta Ciriístu' pué'een. ²⁴A'íjna i ti a'íjna jin jamuaatajé, capu tyi'tíj jin á'itzeere', a'íi pu ajta néijmi'i jin aróo'astej.

Hua'tyojtye' i ti jin ja'antypuá'ritye'ej

²⁵Ta'ihuáamua', siata'aj siajta ityájma jime' jahuoocaj i Dios jimi.

²⁶Siahuo'tatyójtje' néijmi'caa i ta'ihuáamua'.

²⁷A'yaa nu tyajá'mua'ijcatye' i tavástara' jitze ma'can, siaj jo'jíjve'en a'íjna i yu'xarij néijmi'caa jimi i ta'ihuáamua'.

²⁸Che' i tavástara' Jesús i ti ajta Ciriístu' pué'een, che' a'íin tyámua' tyajamuáacha'íin.